

居易錄談

附居易
續談



居
易
錄

談
附居
續談
易

王士正 著

中
華
書
局

叢書集成初編

居易錄談 附居易續談

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘二〇九二毫米三十二分之一

統一書號：一七〇一八·一五一

居易錄談

此據學海類編本
排印初編各叢書
僅有此本

居易錄談卷之上

清 新城王士正貽上著

同年戶部王尙書鵠人岳以御書養素二大字及御製詩一首見示。圓勁秀美，鸞停鵠峙，實希代之寶也。詩云：錦纜無勞列畫艤，輕橈自愛倚船窗。勤民不憚周行遠，早又觀風向浙江。此詩尤可仰見省事寧人之意。不惟書法之工也。又大書地平天成四字，是乃御書會稽禹陵廟額。鈎摹鐫刻，尙書疏請留真蹟，竊許之。尙書時官浙閩總督兵部侍郎云。

翰林院署前積沙，號沙堤。形家言：衙門風水所係。明嘉靖初，張桂用事，去之。詞林幾至空署。近常事欲竝開東西門，稍去其半。數月閒，孟讀學端士^亮、沈讀學宗子^{塘上}、王侍讀龍洲^鍾等七人皆去位。曹祭酒峨嵋禾朱讀學天敘與趙宮贊仲符^執亦以他事誣誤去。其驗如此。

近京師筵席多尙異味。予酒次戲占絕句云：灤鮒黃羊滿玉盤，菜雞紫蟹等閒看。不如隨分閒茶飯，春韭秋菘未是難。嘗憶前輩有詩云：秋來霜露滿東園，蘆菰生兒芥有孫。我與何曾同一飽，不知何苦食雞豚。每喜諷之，此仁人所當念也。

陸啓法客燕雜記書：監板十三經注疏二十一史，修于萬歷二十三年，頗無差訛。崇禎十二年重修之，古字難讀，悉遭改易云。康熙二十三年，予爲祭酒，疏請重修經史刻板，得旨允行。

宋中丞牧仲筆說：濮州守劉某家有綠鳩一雙，狀如鸚鵡。近京師花兒市鬻黃鸝二，毛羽作黃金色，索值

甚高。又日照張琦言其縣人安鴻臚有孫年十三矣甚穎慧讀書樓上忽見樓窗外樹間有紅鴿一隻驚呼示人自探身往取之墜而死鴿亦不見。

盤山和尚智朴號拙菴徐州人能詩居青溝上幸盤山嘗御書戶外一峰四字賜之拙菴丁巳以詩抵子以所著電光雲鶴諸集屬序予亦有兩詩懷之庚午二月五日侍者自山中來寄詩云宮詹學士老詩伯筆掃時風絕世才日把盤山懷我句橫肩柳栗幾時來。

丁巳二月十二日甲戌上御經筵已刻出景運門至文華殿滿漢大學士九卿翰林詹事等衙門官及起居注科道等官立班階之東西上至殿門下盤升御座羣臣東西分班鴻臚引贊行二跪六叩頭禮畢仍分東西班趨入請安大學士兼掌翰林院事徐元文禮部尚書張玉書兵部尚書李天馥刑部尚書杜臻工部尚書兼詹事張英內閣學士兼禮部侍郎彭孫通立班前行東向大學士伊桑阿阿蘭泰王熙梁清標吏部尚書張士甄戶部侍郎蔣宏道禮部侍郎顧汧刑部侍郎鄭重工部侍郎王承祖左副都御史李迥通政使黃斐大理卿陳汝器少詹事兼侍講學士王士正東西侍班日講起居注官少詹事兼侍講學士田喜鑾立西班稍下東向給事中何楷次東班西向御史顧鐸次西班東向諸官出班行一跪三叩頭禮畢大學士徐元文禮部侍郎兼翰林院學士庫勒納講論語志於道章禮部尚書張玉書刑部尚書圖納講尚書無逸篇畢各官仍分東西趨出至階下鴻臚引贊行二跪六叩頭禮仍分班立候駕出回宮賜宴太和門宴畢謝恩而退。

二月十四日。予與工書兼詹事。桐城張公英少詹兼侍講學士馬邑田公壽啓奏。東宮春季會講題目及講官職名。講官欽點張公及左春坊李諭德。鑑四書擬進二題。博學而篤志節。誠者非自誠己而已也。節欽定。君子不重則不威。章仰歎豫教之切。一命題亦不忘訓誡如此。聞上在宮中。親爲東宮講授四書五經。每日御門之前。必令將前一日所授書背誦覆講一過。務精熟貫通乃已。士大夫家不及也。大學士宛平王公。招同大學士眞定梁公學士涓來兄澤宏遊怡園。水石之妙。有若天然。華亭張然所造也。然字陶菴。其父號南垣。以意剏爲假山。以營邱北苑大癡黃鶴畫法爲之。峰壑湍瀨。曲折平遠。經營慘澹。巧奪化工。南垣死。然繼之。今瀛臺玉泉暢春苑。皆其所布置也。唐楊惠之變畫而爲塑。此更變爲山水平遠。尤奇矣。昔人謂俞清侍郎園。峰大小凡百餘。衆峰之閒。縈以曲澗。旁引清流。淙淙然下注石潭。潭中多文龜斑魚。潭上巨竹。蔭藤蒼寒茂密。不見天日。未知視此何如耳。田詹學壽子涓言。上在暢春苑。每引見諸臣。常御澹甯。居止三楹。不施丹雘。亦無花卉之觀。其西卽無逸殿。東宮讀書處。殿外種藝五穀之屬。蓋欲子孫知稼穡之艱難。意深遠矣。三月初十日。上在暢春苑。命下士正陞都察院左副都御史。先是。禮部侍郎缺。擢內閣學士王澤宏爲禮部侍郎。兼翰林院學士。時予名列第四。至是應開列陞閣學諸員。予名在第二。吏部疏未上也。前此左副都御史許禮遷兵部督學。侍郎吏部列通政使黃斐大理寺卿陳汝等名上。留中久之不下。及命下。乃以予陞補許缺。上用人之不測如此。

燕山樵兒澗有熊道人者，能辟穀，嘗旬日不食，食卽以其餘飼虎。虎時時馴擾臥階下，或問其術，道人曰：人忘機于物，物亦忘其機，何術之有？此與列子海鷗之說可相發明。

三月十八日，萬壽節，上在暢春苑，不受朝賀。徐相國云：太皇太后升遐，有上諭，引唐太宗母難之言，以後萬壽節朝賀筵宴俱行停止。今三年矣，聖人大孝，于斯而極。

三月二十一日，內閣大學士伊^桑阿等面承旨于午門外，會議鑄幣江南蘇松二府浮糧。先是，上諭閣臣云：蘇松浮糧一事，朕刻刻在心，此明之弊政，豈可踵而行之？其會同九卿詹事掌印不掌印科道官詳議以聞。

三月至四月，京師幾輔不雨。十三日，奉旨三法司赴刑部清理重囚，予以副憲與焉。原者百十八人，十五日奉旨遣九卿分祭壇廟寺觀祈雨，予至靈佑寺望祭四海，惟遣官祭東嶽泰山，以戶部尙書蘇赫往。萊蕪張^四教字芹沚，順治丙戌進士，以部郎居京師，買一婢，年十四，姿首甚麗，詢其家世，曰：東御艾氏女也。適遷山西提學，因納之，攜行至一驛，晚步驛園中，有雉起草間，感之而孕。到官十月，張以公事將往他郡，妾泣告曰：弱質託體君子，今將娩矣，君事畢，常速歸，冀可相見。張慰之而去。去數日，妾生一子而歿，預留書與張訣，詞極哀豔，多非人世語。又自畫小像一幀，留奩箱中。張歸見之，惋歎而已。自是夜必見夢，休咎皆預告。又時時來自乳其子。張懸像別室，食必親薦，一日羹汗其上，夜夢妾怒詰曰：奈何汗我？旦視之，畫已失。張悵快彌日，致畫師數輩，爲言姿態折曲，髻髻追寫，卒不肖。偶謁巡撫中丞，見屏風畫美人絕肖，屢

目之中丞。頗愛此乎。張因自言其故。中丞卽輟贈焉。攜歸。食奠如常。見夢亦如昔矣。嘗語張君。不利宦途。稍遷卽宜爲退休計。及秩滿。遷榆林道。奏議遂罷歸。李中丞奉倩說。

戊午。上幸內閣。偶問三老五更之義。倉卒奏對。皆未詳晰。今大司馬李公容齋。時爲學士。以老人更知三德五事爲對。本鄭康成說也。按小學紺珠。引月令章句云。三老。國老也。五更。庶老也。盧植禮記注。三公之老者爲三老。鄭大夫老舍爲五更。漢官儀。三公一人爲三老。次卿一人爲五更。

四月某日。啓奏九卿等集後左門。侍衛傳示上用食單。每日止肉九斤。米三升。他物稱是。上之儉德如此。七月十四日。經幸古北口外。寅刻百官跪送于東華門。和碩簡親王從。先是。厄魯特與喀爾喀交惡。厄魯特與兵侵略喀爾喀。地近在邊境。七月。命鎮國公蘇努彭春等帥師出張家口。和碩康親王信都王帥師繼之。屯歸化城。初六日。命和碩裕親王爲撫遠大將軍。與皇長子統大軍出古北口。至是駕行。十六日。安北大將軍和碩恭親王繼行。

康熙二十三年。上南巡江南。提督昭武將軍楊捷迎駕。慰勞甚至。賜御書丹誠二大字額。揭御筆二字。鈐以御璽。紙尾題康熙甲子冬至前賜老將軍楊捷十三字。又御書御製五言一首。岐陽方輦獵。腰裏盡龍媒。仗下黃金勒。橫秋號逸材。紙尾題詠馬二字。皆則御璽。董御史文驥爲記。

沈存中云。信安滄海之間。冬月作小坐牀。冰上拽之。謂之凌冰牀。今京師尙有此制。名凌車。其來遠矣。八月初八日。車駕還京師。入閣九卿迎駕于東直門外十二里。時雨澤已二鼓矣。先是大將軍裕親王以

諸道兵破厄魯特于烏蘭布通。初一日捷書聞行在。次日至京師。宣捷午門。

八月十六日上諭內閣甚欲一見內閣部院大臣。先是駕在塞外。偶違和還宮。未御門接見羣臣者十日矣。內閣九卿等每日詣後左門起居。聞旨皆踊躍。十九日五鼓集後左門。辰刻上御乾清門。有旨召羣臣入。大學士尙書等奏請聖躬萬安。上微笑頷之。仰瞻天顏。神氣充悅。羣臣退以手加額相賀。

九月二十三日。上御乾清門。召九卿奏事。舊例六部都通大分曹次第上殿。是日侍衛傳旨。九卿一同入奏。蓋上初愈。未可久勞也。

十一月切七日。會議端門。李少司馬厚菴語予云。是日蒙上賜謝恩散歸後。上諭侍衛云。王某如尙在外。可召令入見。侍衛傳旨。則士正已入城矣。復命上云。既回不必往召。上之恩遇至此。謹識以示子孫。世世勿忘。

康熙三十年辛未元旦。上御太和門受朝賀。午賜宴。召滿漢內閣大學士。學士。六部尙書。侍郎。都察院。都御史。副都御史。上殿賜酒。是日風日暄霽。仰瞻天顏。悅豫羣臣皆喜。

初六日晨。內閣九卿啓奏乾清門。辰刻奉旨。以戶部尙書文華殿大學士張玉書經筵講官。工部尙書陳廷敬。兵部右侍郎李光地。經筵講官。兵部督部右侍郎王士正。爲會試主考官。禮部左侍郎王熙昌。爲知貢舉官。同考十八人。翰林院編修許承家等七人。兵科掌印給事中卞三畏等四人。吏部郎中鍾儀傑等七人。宴于禮部。賜金花綵段表裏各有差。宴畢入鎖院。

二十七日，恭呈十卷進御覽。次日奉旨，著考試官自定次第。先是二十四年乙丑科會試，主考官刑部尚書張公士甄今吏部尙書等始進擬十卷，恭請上裁，欽定名次，以陸肯堂爲第一。戊辰已來，遵爲定例。然戊辰亦未欽定云。

盤山拙菴智朴禪師，以所創山誌若干卷屬參訂，頗有體裁。所錄碑刻詩文等，亦不汎濫。所述山中物產一卷，尤雅。

御門聽政，冬春辰初三刻，夏秋辰正三刻。內閣部院官率以味爽齊集午門，次至中左門稍憩，乃入候於乾清門外，駕出陞御座。六部都察院等衙門以次奏事。如初一日首吏部，則初二日首戶部，周而復始。若宗人府奏事，則恆居部院之首。三法司例居第三。部院奏事畢，然後臺省官奏事。既畢，然後內閣大學士學士至御前承旨。翰詹起居注官滿漢各一員輪直立西楹下。

海定在明時有戚里李氏園，米太僕仲詔萬鍾勺園亦在。卒卽葬焉。暢春御園落成，而米之墓逼近苑外。其家欲改卜，上知之，特傳旨令勿遷。仍許歲時上冢如常。上之曲體人情如此，真盛德也。

內閣傳諭九卿及翰詹卿寺各衙門堂上官，書嵩山中岳廟濟瀆神祠孟子遊梁祠二程子祠扁額各四字進呈。曰嵩高峻極，曰靈瀆安瀾，曰昌明仁義，曰功存河洛。先是河南巡撫閻中丞與邦恭請御書也。五月十八日，大駕還京師。二十一日，內閣九卿翰詹府寺科道等衙門，以喀爾喀土謝圖汗札薩克圖汗車陳汗，率諸濟農那顏台吉等七旗之衆舉國內附，上表賀，請上尊號，不許。

總兵官蔡元疏請修築邊牆。上命閣臣集九卿面詢可否。以聞。羣臣未及對。大學士伊桑阿公傳玉音云。衆志成城。豈在邊牆。羣臣肅然曰。真大哉王言也。尋有旨不準行。

殿試策例有規式。違式輒不得與上第。康熙戊辰。仁和凌紹雯少習清書。殿試對策。遂用清書漢書兩體寫之。讀卷官奏請上裁。置二甲之末。

康熙三十二年。京城東田家有老嫗。已百三十歲。日飲啖止水米一酒杯。晝夜危坐。形如嬰兒。

京師殺牛驢者。最爲殘忍。予爲中丞時。嘗諭五城痛禁殺驢者。而殺牛皆回回人。雖以世祖章皇帝之誠諭。不能禁也。一日。讀李叔則河濱集愛牛說云。肉牛者十之三。革牛者十之三。角牛者十之四。天下於是無全牛矣。爲之惻然。悚然。叔則古文才極橫。特未簡耳。論說諸篇。尤多可觀。

辛未三四月。京師不雨。多風霾。四月十八日。職方督捕員外郎郭里入署稍早。至皮市。忽大風起。見有神人。朱衣白馬。自北而南。形貌甚偉。風旣過。從人猶見其馬尾。視郭里。已擲馬下。所乘馬屹立於旁。問之。惜然不覺也。歸病三月餘始愈。

戊午夏。予與翰林掌院學士今刑部尙書澤州陳公。敬侍讀學士故刑部侍郎諡文敏崑山葉公。臨侍講學士今禮部尙書桐城張公。英同內直。每有御製。必命和進。一日。賜侍衛輔國公俄啓詩云。觀德由來尙古風。手澤滿月綠沈弓云云。俄啓蓋以宗室宿衛。有穿楊貫札之能。故聖製云然。臣正恭和云。宸章高視漢歌風。絕藝爭誇兩石弓。自是君王勤拊卹。一時龍種盡英雄。蓋此題有三難。御製首倡。一也。旌俄啓。

之射、二也。宗室而兼宿衛、三也。詩僅四句、包此三義、所以難也。壬戌、賜宴乾清宮、賦昇平嘉宴、傲柏梁體。詩御製首倡云、麗日和風被萬方、和者自內閣大學士已下凡若干人。士正時以祭酒領成均、句云、三德六行爲士坊。翊日詩成恭進、上手製詩序、御書之。詩則詔故詹事禮部侍郎曾板刻國子監、兩廡題名。欲購石刊碑、會遷詹事、不果。頃亦語總憲陳公、當遷舊碑于通政司、而別刻都察院題名碑、不知將來得遂否。

戊辰春、予來京師、朱太史竹垞招飲古藤書屋、食半翅、甚美、不知是何鳥。閱盤山新誌云、爾雅鷓鴣冠雉、郭璞注、鷓鴣大如鴿、似雉、鼠脚、無後指、歧尾、爲鳥、愍急羣飛、出北方沙漠、盤山多有之。土人呼爲半翅、卽沙鷄也、亦名鐵脚。



居易錄談卷之中

陳僖酒閒述崇禎中浙西人祝淵北遊上谷寓其家一日與僖父□□翁飲酒酣忽發憤曰丈夫負此七尺貴有傳於後世耳吾欲以詩文自見則當世已有某某度不能與爭名方今可爲之事惟上書救石齋耳石齋謂漳浦也明日遂入京師詣長安門上疏論救予門杖舊例門杖甚于廷杖十死八九祝談笑解衣無恐怖色監杖內鬪曰奇男子也令輕其罰真定梁金金吾清宏左右護持之得遣戍蓋明季士人好名如此

辛未十月初三日仁憲皇太后萬壽節是日奉慈寧旨免行禮而法司乃先一日傳集九卿于天安門議朝審會稟予以爲是日雖有旨免行慶賀禮而各衙門不理刑名況于朝堂集議之大者乎大體所關改日爲是力言之乃各散去

九月十八日上諭諭戶部朕頃巡行邊外入喜峰口見有民間田畝爲蝗蟲所傷又聞榛子鎮及豐潤縣等處地方被蝗災者所在閒有秋成失望則粒食維艱朕心深切軫念著行該撫親歷直隸被災各州縣通加察勘悉心籌畫應作何積貯該撫詳議具奏其被災各地方明歲錢糧若仍照例催科小民必致苦累著候該撫察報分數到日將康熙三十一年春夏二季應徵錢糧緩至秋季徵收用稱朕體恤民生休息愛養至意

十二月初二日內閣傳集九卿宣諭旨欲盡蠲三十一年天下直省漕糧漕糧自前代無蠲免之例浩蕩之恩三百餘年初見也時九卿議各不同有謂正糧之外向有餘米京師地大人衆胥仰給焉若漕艘不至京師米價翔貴於事體未便或謂此固常慮只須分省分年作三年遞爲蠲免則皇仁普遞而京師米價亦平矣遂具兩議啓奏上以分省遞蠲之議爲然尋頒上諭云朕撫馭區宇三十年來早夜圖維惟以愛育蒼生俾咸臻安阜爲念比歲各省額徵錢糧業已次第蠲豁其歲運漕米向來未經議免朕時切軫懷所有京通倉米穀撙節支給數載于茲今觀歷年儲積之粟恰足供用應將起運漕糧逐省蠲免以紓民力除河南省明歲漕糧已頒諭免徵外湖廣江西浙江蘇安徽山東應諭漕米著自康熙三十一年始以次各蠲免一年至江寧京口杭州荊州大兵駐防地方亦應預行積貯著將康熙三十一年起運三十年漕米各截留十萬石存置倉廩令該地方官敬慎守視以備需用爾部卽遵諭行

辛未冬京師民家生子一身兩首眉目耳鼻皆具

會試進士呈十卷候御筆批定會元已下名第始于康熙乙丑然考之玉堂漫筆宋朝故事每廷試卷前十名御藥院先以文卷奏御定高下高宗建炎開始罷之古之人亦有行之者今殿試第三日讀卷官例擬鼎甲三人及二甲前七名凡十卷進呈御覽往往有改易者不盡依所擬名第也

上諭諭禮部自昔帝王敬天勤政凡遇垂象示儆必實修人事以答天戒頃欽天監奏推算日食當在三十一年正月朔日夫日食爲天象之變且又見于歲首朕兢惕靡寧力圖修省大小臣工務精白乃心各

盡職業、以稱朕欽承昭格至意。其元日行禮筵宴著停止。

予于慈仁寺、市得徐一夔始豐稟文十四卷、無詩。陳繼儒嘗稱一夔宋行宮考吳越國考、研檢精確。予觀集中如歐史十國年譜、備證錢塘鐵箭辨等篇、皆極精核、不獨二考也。

壬申正月十一日、祭祈穀壇、上偶患癰、未痊、令內閣禮部太常寺集議查照典例、請遣官恭代。上疑之初七日、復下九卿集議、議如前。閒臣啓奏、得俞旨、仍令照例、追銅人於宮中齋戒。蓋上登極三十年以來、凡郊廟大祀、無不躬親。雖大雨雪必出、敬天尊祖、久而勿怠如此。凡祭祀、則太常寺預進劇、置乾清門、銅牌南向、銅人西向。

京師冬月養花者、多鬻牡丹芍藥、紅白梅碧桃、探春諸花於廟市。其法置花樹于暖室地坑、以火逼之。猶癸辛雜識所記馬塍塘花亦作堂花之類。康熙庚午三月、予自少詹事遷副都御史、又旬日、馬邑田子渭喜驛、

亦自少詹事遷內閣學士。一日、赴起居館晤別翰林掌院學士滿洲掌院學士庫勒納公。今戶部曰、公等

亦見冬日鬻花者乎。置之密室、鑿地作坎、綆竹其下、灌以牛溲、培以硫黃、覓引沸湯、扇以微風、盎然春溫、經宿而花放矣。衆花固未蓓蕾也。及二三月、衆花應候而發、而冬花已憔悴、視其根、則已腐敗久矣。蓋春花、知命而待時者也。冬花、不知命而違時者也。仕宦亦然。吾見夫冬花之榮落亦多矣。公等今日之擢、乃春花也。雖遲發、亦不速敗。予深感其言、類有道者。因記之。

地氣北寒南煥、亦不盡然。庚午冬、京師不甚寒、而江南自京口達杭州、裏河皆凍。揚州驛網皆移蘇杭。甚至揚子錢塘江、鄱陽洞庭河亦凍。江南柑橘樹皆枯死。其明年、京師柑橘樹不至、惟福橘閒有至者、價數倍。